



Inatsisartuni ilaasortat
/maani

**15. maj 2019-imi nal. 10.00 nalunaaquttap akunnerani apeqqarissaarfiusumi
apeqqutinut allakkatigut akissuteqaat**

21-05-2019
Suliaq nr.: 2019 - 12285
Id nr. 41377826

15. maj 2019-imi nalunaaquttap akunnerani apeqqarissaarfiusumi Anders Olsen, Siumut, sullissisut marluusut akornanni suleqatigiinnerup pitsaanerulersinneqarnissaa pillugu Air Greenlandip, Disko Linep aamma Naalakkersuisoqarfiup akornanni suleqatigiissitap killiffia pillugu apeqquteqarpoq.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Apeqquteqarnermi Kalaallit Nunaata kujataani angallannermi pissutsit pineqarput, tassani Anders Olsenip nammineerluni piffissami sivisuumi Narsarsuarmi saperngulluni misilissimallugu. Tamanna tunngavigalugu Disko Linep aamma Air Greenlandip akornanni suleqatigiinnerup pitsaanerulersinneqarsinnaanersoq apeqqutigaa.

Tamatuma saniatigut Anders Olsenip 8 mio. koruunit, kiffartuussinissamut isumaqatigiissutit pitsanngorsarneqarnissaannut aningaasanut inatsimmi immikkoortinneqarsimasut atornerqarneranni killiffik apeqqutigaa.

Apeqqutinut taakkununga tunngatillugu imatut ilisimatitsissuteqarsinnaavunga: Air Greenlandip aamma Disko Linep akornanni ingerlaavartumik qanittumillu suleqatigiittoqarpoq. Ingerlatseqatigiiffiit marluusut taakku angallannerup ingerlanera pillugu ingerlaavartumik oqaloqatigiittarput, isumaqarpungalu ulluinnarni unammilligassat, taamatullu angallannermi pitsannguiniarluni suliniutit nutaat suleqatigiinneq taanna aqqutigalugu iluarsivigineqartartut.

Tassunga tunngatillugu Naalakkersuisoqarfinniit sullissisut tamarmik ingerlaavartumik suleqatigineqarput, aammalu Air Greenlandip Disko Linellu akornanni suleqatigiinneq pillugu oqaloqatigiinnermut peqataalluni. Nalunaaquttap akunnerani apeqqarissaarfiusumi ilisimatitsinittut, suleqatigiissitaq nalinginnaasoq pilersinneqarsimangilaq, suleqatigiinneq matuma siuliani allaaserineqartutut suliassat pisariaqartitsinerillu takkunnerini ingerlanneqartarmat.

Aningaasat kiffartuussinissamik isumaqatigiissutinut pitsannguutissanut immikkoortinneqartut ilaat Upernavimmi eqqaanilu juullikkunni angallanneq qulakkeeriffiniarlugu decembarip qaammataani atornerqarput. Tassani juulleriarernerani qulimiguulimmut inuttat ilaneqarput.

Tamatuma kingorna Naalakkersuisut januaarimi marsimilu qulimiguulinnut inuttat ilaneqaqqinnissaat misilikkaluarpaat. Qinnuteqaalli piffissaagallartillugu Inatsisartut Aningaasaqarnermut Akileraartarnermullu Ataatsimiititaliaannit suliarineqanngilaq, taamaattumillu aningaasanut inatsimmiit aningaasaliissutaasut piffissaq eqqorlugu

atorneqarsinnaasimangillat.

Tamatuma saniatigut Naalakkersuisut suli sullissisut peqatigalugit aningaasat isumaqarnerpaaffiitut atorneqarnissaannik ujartuinertik ingerlappaat.

Inussiarnersumik inuulluaqqusillunga



Karl Frederik Danielsen